

■ FALERA

Il concert per Montreux 2005

(abc) Dacuort ha la Brass Band Sursilvana (BBS) inaugura suu empren disc compact. Sonda proxima envida ella ad ina sentupada sin tribuna da concert. Ella Fermata a Falera ha liug il concert preparatoric per la concorrenza svizra da brass bands a Montreux. A caschun da quei eveniment vegn la BBS a presentar suu program da concert concepiv per Montreux 2005. Cul dirigent partent *Urs Cadruvi* e cun suu successur designau *Roman Caprez* ha la formaziun d'emprena classa empriu in program el stil original dil brass engles. Il repertori cumpiglia orvras originalas, arranschaments ord la classica sco era musica da divertiment contemporana. Denter ils 13 tocs dil program anfl'ins tocs sco «Silver Mountain», il splenduront «Cry of the Celts», il duet fetg commuentont per eufoni «Lament» cun *Gian Carlo Caviezel* ed *Arnold Caminada*, il toc «Dundonnel» da Philip Sparke, «Breakout» cul solist *Marco Wüst* ed auters. La viseta al concert ei la caschun da s'entupar cun ina dallas valentas ambassaduras dalla cultura da musica dalla Surselva.

Il concert ella Fermata a Falera entscheiva sonda sera allas 20.00.

■ CANT

Surdada dalla fiasta e dieta da cant a Glion

(abc) Sonda proxima s'entaupan ils chors sursilvans a Glion alla 5avla dieta da cant. Quella ei combinada uonn cun ina radunonza extraordinaria dil District da cant Surselva. Tema central dalla «extraordinaria» ei la surdada dalla fiasta districtuala 2007. Tenor decisiun dils delegai alla radunonza dils 9 d'avrel a Rueun ei la fiasta da cant vegnida scretta ora ina secunda gada. Sco sulet candidat ei il Chor viril da Domat s'annunziaus. Quei chor ei s'univus avon dus onns al DCS per mussar e rinforzar ses ligioms culla Surselva. Alla radunonza extraordinaria vegnan ils da Domat a presentar officialmeun lur candidatura. L'infrastructura a Domat cullas baselgias e hallas garantecha d'organisar ina fiasta ella dimenziun d'entochen ussa.

La radunonza extraordinaria dil DCS ha liug ell'aula dalla casa da scola a Glion ed entscheiva allas 13.00. Immediat suenter suonda la 5avla dieta da cant dil District da cant Surselva. Quell'occurrentia d'atun ei daventada ina tradiziun cun effect. «Finamira eis ei da promover la composiziun romontscha e da dar la pussevilladad a nos cumponists romontschs da presentar lur ovras a nos dirigents e cantadurs», scriva il president dalla cumissiun da musica dil DCS, *Christoffel Nay*, en siu invit als chors. Uonn s'occupan ils presents culs cumponists *Peter Appenzeller* e *Giusep Tschuur*. Ils dus musicists ein beinenconuschents a cantaduras e cantadurs. Els vegnan a presentar in tschuat novas cumposiziuns e las pussevilladadas da luvrar cun quellas.

La dieta da cant ell'aula da Glion ei publica, ella entscheiva allas 14.00. Scadina e scadin ein beinvegni.

reclama

Käse, Uhren,
offene Läden:
Schöne Ferien
in der
Schweiz!

Arbeitsgesetz

Komitee für offene
Bahnhöfe und Flughäfen
Pf 8252, 3001 Bern

JA

Prestaziun drammatica admirabla

La Gruppa da teater Cuschnaus dat il toc «Il cant dil salep»

■ (mc) Cun constanza admirabla ei l'Uniu da teater Cuschnaus sepresentada el decuors dils 16 onns ch'ella exista, aschia ch'ella ha acquistau en quei interval bia experienza e disponoz da giugadurs rutinai. Actualmeun dat la gruppa cun grond success la cumedia «Il cant dil salep». Suentier ina pausa pli lunga sedada entras la Passiun 2003 ei la gruppa puspei turnada sin sia tribuna-casa el Center da scola, sport e cultura a Cuschnaus e reprim la tradiziun dallas cumedias. E culla cumedia «Il cant dil salep» dil scribent spagnol Alfonso Paso (1926-1978) han ins tuccau la noda resp. il gust digl auditori. La translaziun romontscha procurada d'*Erwin Caduff* ei culonta ed adattada pil lungatg plidau sin tribuna. Ils quater giugadurs *Erwin Caduff* (Aris), *Simona Montalta* (Bisbi), *Geta Riedi* (Elisa), *Alexi Camenisch* (Alfredo) ed *Ormar Camenisch* (Pepe) dirigi dil regissur *Nicolaus Caduff* han schau ora cups. Els giogan cun gronda rutina ed experienza drammatica. La professionalitad semuossa cunzun era ella tgira dils detagls ed el cumportament fetg natural. Ed il regissur para da haver giu in fetg bien maun culla repartiziun dallas rollas. Malgrad las fermas prestaziuns dils singuls giugadurs rutinai eis ei buc aschia ch'in ni l'auter seproflescha sin donn e cuost da l'autra e l'entira inscenaziun fa ina impressiun ordvart cumpacta. La canorta dil salep postada el pierti e siu decor spagnol introducescha visitadras e visitaders ella tematica. La scenaria ei spartanica e cumporta al stan desolat dalla baita dil salep.

Dus filosofias da veta differentas

Ella cumedia da dus acts fruntan duas filosofias da veta diametralmeun oppostas ina sin l'autra. Simbolisadas vegnan quellus duas filosofias entras il salep che



Malgrad tenutas essenzialmeun differentas careza la feglia Bisbi (Simona Montalta) siu bab Aris (Erwin Caduff) ella dispetta cun sia mamma Elisa (Geta Riedi) ch'ei ina capavla dunna da fatschen-ta. FOTO M. CABALZAR

gauda la veta e fa buca quidaus e la furmicla che lavura incuntin tschercond d'augmentar cun gronda acribia sia facultad. Ch'ei sto dar tensiuns e dispetas ord quellus tenutas diversas ella veta quotidiana ei evident. Il bab Aris Terch (Erwin Caduff), in tip nunconvenzional e flegmatic, viva cun sia feglia Bisbi (Simona Montalta) e tut ses auters affons ch'ei in il product da fleivlezias humanas ordeifer la lètg en ina baita alla periferia dil marcau. Il bab viva d'in gi sin l'auter, gauda la veta, negligescha sesez e lai dar l'aura pils larischs. Malgrad quei vegn el carezaus da sia feglia ch'ei permanentmeun occupada da dar cavegl en casa. La mamma (Geta Riedi), ina dunna strenga e digl uorden cun grondas ambiziuns professionalas ha buca pudiu tener ora

ditg cun siu um, ha bandunau quel ed ha fatg ina carriera briglianta ell'economia. Sia veta materialistica fa ella sclava dallas convenziuns e renda ella ventireivla e cuntenza, cuntrari a siu mariu che gauda la paupradad libra da convenziuns. Fertion che igl entir contuorn piarda bunamein la gnarva, resta Aris ruasseivels e fideivels a sesez. Gnanc la maridaglia d'in feigl dad Aris ed Elisa cun ina feglia ord casa distinguida e l'amicezia dil giuven Alfredo (Alexi Camenisch) cun Bisbi (Simona Montalta) pon fierer el ord canvau.

Sia dunna ei denton sin sedesperar, sentsa cuglienada e daventa persula malgrad sia gronda reputaziun ella societad ch'ei denton superficiala e pauc sincera. En scadin cass animescha la cumedia

il publicum da filosofar e discutir vinvon sur il senn dalla veta, il squetsch da prestaziun e la qualitat da viver. Probbel vegn in e scadin ad autras conclusiuns e quei ei bien aschia. La finala sto mintgin tscherchar sez la via per anflar sia ventira, cheu dat ei buca recepts generals ed imitaziuns da filosofias jastras savesen menar ad ina schliata fin. En quei senn ei il teater che vegn daus a Cuschnaus buca mo divertents, mobein era instructiv e filosofic.

Proximas presentaziuns sonda, ils 19 da november allas 20.15, dumengia ils 20 da november allas 13.30, mesjamna ils 23 da november allas 20.15 e sonda ils 26 da november allas 20.15. Reservaziuns da plaz denter las 18.00 e las 20.00 tier 081 931 35 77 ni www.teater-cuschnaus.ch.

Chor viril Lumnezia e Krumbambuli a Turitg

Concert da beneficenza en favur dils tschocs el «Grossmünster» a Turitg

■ (mc) Dumengia suentermiezdi ha liug el «Grossmünster» a Turitg in concert da beneficenza organisau dil Club da Lions da Herliberg en favur dils tschocs. Dalla partida ein era duas formaziuns romontschas: il Chor viril Lumnezia ed igl ensemble musical Krumbambuli. Il concert al qual era la Cantoria da Stäfa, il «Singkreis Herliberg» ed il Chor da giuventetgna dalla Opera da Turitg separticipeschan entscheiva dumengia suentermiezdi allas 15.00 ella vasta baselgia dil «Grossmünster» a Turitg. Il project vegn realisau dil Club da Lions Herliberg en collaboraziun cul curtgin zoologic da Turitg e l'Associaziun svizra dils tschocs. Il program musical cun tschun formaziuns da num e pum da differenta grondezia e vegliadetgna para dad esser variants e divertents. Atras il program accumpogna il directur dil zoo *Alex Rübel*. Las duas formaziuns sursilvanas selegran s'entelli era dalla viseta da Grischuns e Romontschs domiciliai a Turitg al concert.

Krumbambuli

L'entschatta dat igl ensemble vocal Krumbambuli che vegn dirigius da *Claudio Simonet* cun ogt canzuns da differenta provegnientscha e lungatg ch'ei per part arranschadas aposta dil dirigent sez per quella formaziun. Il pign ensemble vocal consista da 9 cantaduras, in bariton ed in pianist. Lur repertori tonscha dalla canzun populara sur la classica entochen a cumposiziuns contemporanas. Las solistas ein stadas ni ein aunc adina en scolaziun e perfecziun musicala tier *Claudio Simonet* che meina era la Scola da musica Surselva.

Cantoria da Stäfa

La Cantoria da Stäfa, constituida sco chor ecumen che conta sut la direcziun da *Pius Brunner* tgira cunzun il cant sacral cun ovras che sestendan dil temps medieval entochen l'epoca contemporanea. Actualmeun ei la formaziun cantica che dumbra 30 cantaduras e cantadurs lundervi d'emprender igl oratori *Messias* da G. F. Händel che vegn presentaus per l'emprena gada primavera proxima ton a Stäfa sco a Pfäfers.

Chor viril Lumnezia

Il Chor viril Lumnezia che dumbra actualmeun rodund 90 cantadurs vegn dirigius dapi in onn dil giuven musicist *Clau Scherrer*. A Turitg vegn il chor a se-presentar exclusivameun cun canzuns po-

pularas romontschas da Hans Erni, Tumasch Dolf, Benedetg Dolf, *Carli Scherrer* e *Gion Antoni Derungs*. Dapi entgens onns tgira il Chor viril Lumnezia contacts amicabels ton cul Chor viril da Turitg sco cul «Singkreis» da Herliberg ed igl ei buca l'emprena gada ch'ins coopeschescha en in concert communabel.

Singkreis Herliberg

Il «Singkreis Herliberg» che vegn dirigius dil musicist *Andri Calonder* ei el decuors da ses 20 onns d'existenza adina puspei sepresentaus alla publicitad cun ovras per chor ed orchester da renomai cumponists. Sper la tgira primordiala dil cant sacral conta il chor denton era canzuns profanas a capella. El Grossmünster vegn il chor a cantar quater parts da chor

dalla messa d'ecoronaziun da Wolfgang Amadeus Mozart. Sco solista funcziunescha *Judith Bechter* (sopran).

Chor juvenil dalla Opera da Turitg

Il Chor da giuventetgna dalla Opera da Turitg consista da rodund 15 juvenils entusiasmai dalla musica denter 15 e 25 onns e vegn dirigius da *Jürg Hämmerli* che diregia era il Chor dalla opera da Turitg. Il chor sedistingua entras ina gronda flexibilitad e dinamica e se-presenta mintg'onn cun denter 30 e 40 concerts. Plirs cantadurs dil chor juvenil ein era engaschai sco solists en differentas operas che vegnan dadas a Turitg. El Grossmünster se-presenta il chor cun canzuns modernas ed era cun musica da film.



Dalla partida el concert da dumengia proxima ei era il Chor viril Lumnezia che vegn dirigius da *Clau Scherrer*. FOTO A. BEELE